

**2012 Rhif 365 (Cy. 60)**

**TRAFFIG FFYRDD, CYMRU**

**Gorchymyn Cefnffordd yr A55  
(Cyffordd 16a (Dwygyfylchi)  
Bwrdeistref Sirol Conwy) (Cyfyngu  
a Gwahardd Traffig Dros Dro) 2012**

*Wedi ei wneud 10 Chwefror 2012*

*Yn dod i rym 20 Chwefror 2012*

Mae Gweinidogion Cymru, sef yr awdurdod traffig ar gyfer y darnau perthnasol o Gefnffordd Caer – Bangor (A55) (y cyfeirir ati yma wedi hyn fel “y gefnffordd”), wedi eu bodloni y dylai traffig ar ddarnau penodedig o’r gefnffordd gael ei gyfyngu neu ei wahardd oherwydd gwaith y bwriedir ei wneud arnynt.

Mae Gweinidogion Cymru, felly, drwy arfer y pwerau a roddwyd iddynt gan adran 14(1), (4) a (5) o Ddeddf Rheoleiddio Traffig Ffyrdd 1984(1) a phob pŵer galluogi arall,(2) yn gwneud y Gorchymyn hwn.

**1.** Daw’r Gorchymyn hwn i rym ar 20 Chwefror 2012 a’i enw yw Gorchymyn Cefnffordd yr A55 (Cyffordd 16a (Dwygyfylchi) Bwrdeistref Sirol Conwy) (Cyfyngu a Gwahardd Traffig Dros Dro) 2012.

**2.—(1)** Yn y Gorchymyn hwn:

ystyr “cerbyd esempt” (“*exempted vehicle*”) yw unrhyw gerbyd sy’n cael ei ddefnyddio at y gwasanaethau brys neu mewn cysylltiad â’r gwaith sy’n arwain at y Gorchymyn hwn;

ystyr “cyfnod y gwaith” (“*works period*”) yw’r cyfnod hwnnw sy’n dechrau am 18.30 o’r gloch ar 20 Chwefror 2012 ac sy’n dod i ben pan fydd yr arwyddion traffig dros dro wedi eu tynnu oddi yno’n derfynol;

ystyr “y darnau o’r gefnffordd” (“*the lengths of the trunk road*”) yw’r darnau hynny o gefnffordd yr A55 wrth Gyffordd 16a, Dwygyfylchi, ym Mwrdeistref Sirol Conwy a bennir yn Atodlenni’r Gorchymyn hwn.

(2) Mae unrhyw gyfeiriad yn y Gorchymyn hwn at erthygl neu Atodlen â rhif yn gyfeiriad at yr erthygl neu'r Atodlen sy'n dwyn y rhif hwnnw yn y Gorchymyn hwn.

3. Yn ddarostyngedig i ddarpariaethau erthygl 7, ni chaiff neb, yn ystod cyfnod y gwaith, yrru unrhyw gerbyd, na pheri na chaniatáu i unrhyw gerbyd, heblaw cerbyd esempt, fynd ar y darnau o'r gefnffordd a bennir yn Atodlen 2 i'r Gorchymyn hwn.

4. Yn ddarostyngedig i ddarpariaethau erthygl 7, ni chaiff neb, yn ystod cyfnod y gwaith, reidio unrhyw feiciau pedal na pheri na chaniatáu i unrhyw feiciau pedal gael eu reidio ar y darnau o'r gefnffordd a bennir yn Atodlen 2 i'r Gorchymyn hwn.

5. Yn ddarostyngedig i ddarpariaethau erthygl 7, ni chaiff unrhyw gerddwr, yn ystod cyfnod y gwaith, fynd ar hyd y darnau o'r gefnffordd a bennir yn Atodlen 2 i'r Gorchymyn hwn.

6. Yn ddarostyngedig i ddarpariaethau erthygl 7, ni chaiff neb, yn ystod cyfnod y gwaith, yrru unrhyw gerbyd modur, na pheri na chaniatáu i unrhyw gerbyd modur fynd yn gyflymach na 40 milltir yr awr ar y darn o'r gefnffordd a bennir yn Atodlen 1 i'r Gorchymyn hwn.

7. Ni fydd darpariaethau erthyglau 3, 4, 5 a 6 yn gymwys ond yn ystod yr adegau hynny ac i'r graddau hynny y bydd arwyddion traffig yn dangos bod y gwaharddiadau a'r cyfyngiadau y maent yn cyfeirio atynt yn weithredol.

8. Bydd y Gorchymyn hwn yn para am 12 mis ar y mwyaf.

Llofnodwyd o dan awdurdod y Gweinidog Llywodraeth Leol a Chymunedau, un o Weinidogion Cymru.

Dyddiedig y 10 Chwefror 2012

*G R Morgan*

**GARETH MORGAN**

Pennaeth Gwasanaethau Arbenigol Seilwaith

Llywodraeth Cymru

- (1) 1984 p.27; amnewidiwyd adran 14 gan Ddeddf Traffig Ffyrdd (Cyfyngiadau Dros Dro) 1991 (p.26), adran 1(1) ac Atodlen 1.
- (2) Yn rhinwedd O.S. 1999/672, erthygl 2 ac Atodlen 1, a pharagraff 30 o Atodlen 11 i Ddeddf Llywodraeth Cymru 2006, mae'r pwerau hyn yn arferadwy bellach gan Weinidogion Cymru o ran Cymru.

## **ATODLENNI**

### **ATODLEN 1**

#### **Terfyn Cyflymder 40 mya Dros Dro**

Y darn hwnnw o gerbyffordd y gefnffordd tua'r gorllewin sy'n ymestyn o bwynt canol y gilfan cyn Twnnel Penmaen-bach hyd at bwynt 3125 metr i'r gorllewin wrth Gyffordd 16 (Puffin).

### **ATODLEN 2**

#### **Gwahardd Cerbydau, Beicwyr a Cherddwyr Dros Dro**

Y darnau cyfan o ffyrdd ymuno ac ymadael y gefnffordd tua'r gorllewin wrth Gyffordd 16a, Dwygyfylchi.